



SLUŽBENI GLASNIK OPĆINE VISOKO

GODINA XLIX

Visoko, PETAK, 23. oktobar 2015. godine

BROJ 7

76.

Na osnovu člana 42. stav (1) Zakona o prostornom uređenju i građenju («Službene novine ZDK», broj: 1/14) i člana 22. stav (1) tačka 5. Statuta općine Visoko («Službeni glasnik općine Visoko», broj: 1/11 i 8/13) Općinsko vijeće Visoko, na 31. sjednici, održanoj 17.10.2015. godine, donijelo je

ODLUKU O PRISTUPANJU IZRADI REGULACIONOG PLANA ČEKREKČIJE - VISOKO

Član 1.

Pristupa se izradi Regulacionog plana Čekrekčije - Visoko (u daljem tekstu Regulacioni plan).

Član 2.

Regulacioni plan radi se, na osnovu Prostornog plana općine Visoko za period od 2014. do 2034. godine, za dio urbanog područja Čekrekčije, Vrela i Dolipolje i građevinsko zemljište vanurbanog područja Čekrekčije.

U obuhvatu urbanog područja Čekrekčije, Vrela i Dolipolje pristupa se izradi Regulacionog plana za: poslovnu zonu Čekrekčije I, poslovni kompleks Čekrekčije II, izmjene postojećeg Regulacionog plana Čekrekčije i dio naselja Čekrekčije, Vrela i Dolipolje.

Regulacioni plan obuhvata područje ukupne površine od 200,18 ha.

Član 3.

Nosilac pripreme Regulacionog plana je Služba za urbanizam, stambeno-komunalne poslove i katastar nekretnina općine Visoko koja će, u skladu sa odredbama Zakona o prostornom uređenju i građenju odrediti nosioca izrade Regulacionog plana.

Član 4.

Priprema i izrada Regulacionog plana provest će se u skladu sa postupkom i rokovima

utvrđenim u Zakonu o prostornom uređenju i građenju, a najkasnije do juna 2016. godine.

Član 5.

Izrada Regulacionog plana finansirat će se sredstvima investitora koji imaju poseban interes za izradu ovog planskog dokumenta, u skladu sa odredbama Zakona o prostornom uređenju i građenju, o čemu će sa investitorima biti zaključen poseban sporazum.

Član 6.

Sastavni dio ove odluke je grafički prikaz obuhvata Regulacionog plana.

Član 7.

Ova odluka stupa na snagu osmog dana od dana objavljivanja u «Službenom glasniku općine Visoko».

Broj: 01/1-02-366/15
17.10.2015. godine
Visoko

PREDSJEDAVAJUĆA
OPĆINSKOG VIJEĆA VISOKO
Mirela Mateša Bukva

77.

Na osnovu člana 13. stav 2. Zakona o principima lokalne samouprave u Federaciji Bosne i Hercegovine („Službene novine FBiH”, broj 49/06 i 51/09), člana 4. stav 2. Zakona o cestama Federacije Bosne i Hercegovine („Službene novine FBiH”, broj: 12/10, 16/10 i 66/13- ispravka) i člana 22. Statuta općine Visoko („Službeni glasnik općine Visoko”, broj 1/11 i 8/13), Općinsko vijeće Visoko, na 31. sjednici, održanoj 17.10.2015. godine, donijelo je

ODLUKU O NERAZVRSTANIM CESTAMA NA PODRUČJU OPĆINE VISOKO

I - OPĆE ODREDBE

Član 1.

(1) Ovom odlukom uređuje se upravljanje, izgradnja, rekonstrukcija i sanacija, održavanje, zaštita, korištenje, uređenje prometa i poslovi nadzora na nerazvrstanim cestama na području općine Visoko.

Član 2.

(1) Nerazvrstana cesta koju je nadležni organ proglasio za nerazvrstanu cestu u općoj je upotrebi, u vlasništvu Općine Visoko i od općeg interesa za Općinu.

(2) Nerazvrstana cesta je površina koja se koristi za saobraćaj po bilo kojoj osnovi i koja je pristupačna većem broju korisnika, a nije svrstana ni u jednu kategoriju javnih cesta.

Član 3.

(1) Nerazvrstanu cestu čini:

- cestovna građevina (gornji i donji stroj ceste),
- cestovni pojas širine 1m od vanjskog ruba ceste s obje strane,
- vazdušni prostor iznad kolovoza u visini do 7m,
- cestovni građevinski objekti (mostovi, propusti, nadvožnjaci, podvožnjaci, nathodnici, pothodnici, potporni i obložni zidovi, nasipi, i sl.),
- građevine za odvodnju i pročišćavanje vode,
- saobraćajne površine uz kolovoz (pješačke staze neposredno uz kolovoz ili odvojene od kolovoza, autobuska stajališta i okretišta),
- saobraćajna signalizacija (horizontalna i vertikalna saobraćajna signalizacija, instalacije i javna rasvjeta u funkciji saobraćaja, svjetlosno-signalni uređaji, oprema parkirališta, odmorišta i sl.),
- oprema ceste (snjegobrani, vjetrobri, zaštite od obrušavanja i nanosa, zaštitne i sigurnosne ograde, odbojnici i sl.).

II - UPRAVLJANJE NERAZVRSTANIM CESTAMA**Član 4.**

(1) Općinska načelnica/Općinski načelnik Visoko putem nadležnih općinskih službi vrši:

- poslove projektovanja, izgradnje, rekonstrukcije, održavanja i zaštite nerazvrstanih cesta,
- stvara uslove za normalno korištenje i provođenje mjera zaštite nerazvrstanih cesta,
- privremeno zabranjuje ili ograničava odvijanje saobraćaja na nerazvrstanoj cesti ili dijelu nerazvrstane ceste zavisno od stanja ceste, izvođenje radova i mogućnosti obavljanja saobraćaja,

- vodi evidenciju (bazu podataka) nerazvrstanih cesta,
- daje saglasnosti za izvođenje radova u pojasu nerazvrstanih cesta,
- predlaže godišnje redovno održavanje nerazvrstanih cesta iz namjenskih sredstava, a u okviru posebnog Programa održavanja nerazvrstanih cesta koji donosi Općinsko vijeće.

III - IZGRADNJA, REKONSTRUKCIJA I SANACIJA NERAZVRSTANIH CESTA**Član 5.**

(1) Općinska načelnica/Općinski načelnik Visoko poslove izgradnje, rekonstrukcije i održavanja nerazvrstanih cesta ustupa u skladu sa odredbama Zakona o javnim nabavkama („Službeni glasnik BiH”, broj: 39/14).

Član 6.

(1) Izgradnja, rekonstrukcija, sanacija i održavanje nerazvrstanih cesta vrši se u skladu sa savremenim stručnim saznanjima i procjenama opravdanosti.

Član 7.

(1) Planiranje razvoja nerazvrstanih cesta vrši se u skladu sa planom i programom koje na prijedlog Općinske načelnice/Općinskog načelnika donosi Općinsko vijeće.

Član 8.

(1) Pod izgradnjom nerazvrstanih cesta u smislu ove odluke smatra se izgradnja nerazvrstanih cesta po pretežno novoj trasi, a obuhvaćaju građevinsko projektovanje i drugo projektovanje sa istražnim radovima, projektovanje opreme, pratećih objekata, saobraćajne signalizacije i drugo projektovanje, otkup zemljišta i objekata, premještanje komunalne infrastrukture, pribavljanje odobrenja za građenje, ustupanje radova građenja, organizaciju stručnog nadzora i kontrole ugrađenih materijala i izvedenih radova, tehnički pregled i primopredaja na korištenje i upravljanje nerazvrstanih cesta i objekata.

(2) Pod rekonstrukcijom nerazvrstane ceste u smislu ove odluke smatraju se radovi na dijelu postojeće ceste kojim se mijenjaju njene tehničko-građevinske karakteristike i konstruktivni elementi sa ciljem povećanja kapaciteta ceste i poboljšanja uslova saobraćajnih usluga.

(3) Izgradnja i rekonstrukcija nerazvrstanih cesta se može izvesti na osnovu tehničke dokumentacije izrađene od ovlaštenog pravnog lica.

(4) Pod sanacijom nerazvrstanih cesta u smislu ove odluke podrazumijevaju se radovi kojima se

poboljšava sigurnost učesnika u saobraćaju i održavanje projektovanog stanja nerazvrstanih cesta.

(5) Sanacija nerazvrstanih cesta se može izvesti bez tehničke dokumentacije izrađene od ovlaštenog pravnog lica, projekta i građevinske dozvole.

Član 9.

(1) Minimalna širina kolovoza nerazvrstane ceste koja se izgrađuje je 4,50 m za dvosmjerni saobraćaj i 3,0 m za jednosmjerni saobraćaj sa konstrukcijom koja podnosi minimalno osovinsko opterećenje od 6 t.

Član 10.

(1) Iznad cijele širine kolovoza nerazvrstane ceste mora biti slobodan prostor od najmanje 7,0 m.

Član 11.

(1) Ako je prilikom izgradnje nerazvrstane ceste planirana i izgradnja komunalnih, vodoprivrednih i drugih objekata, tehnička dokumentacija mora obuhvatiti i te objekte i radove koji se planiraju izvesti.

(2) Troškove izrade tehničke dokumentacije i izgradnje objekata iz stava 1. ovog člana snosi investitor planiranih objekata i radova.

Član 12.

(1) U slučaju rekonstrukcije nerazvrstane ceste i vršenja radova koja iziskuju premještanje postojećih instalacija u cestovnom pojasu, vlasnici tih instalacija su dužni o svom trošku izmjestiti te instalacije odnosno prilagoditi ih nastalim promjenama.

(2) Investitor radova na rekonstrukciji ceste dužan je najmanje tri mjeseca ranije obavijestiti vlasnika instalacija o početku radova na rekonstrukciji nerazvrstane ceste i omogućiti mu uvid u tehničku dokumentaciju, ali nije obavezan pribavljati saglasnost vlasnika postojećih instalacija.

(3) U slučaju da vlasnik instalacija ne izvrši obavezu iz prethodnog stava, investitor radova na rekonstrukciji nerazvrstane ceste će izvršiti premještanje postojećih instalacija na teret vlasnika instalacija.

(4) U slučaju preusmjeravanja saobraćaja na nerazvrstanu cestu radi izvođenja radova na javnoj cesti, upravitelj javne ceste je dužan, po okončanju radova i uspostavljanju saobraćaja na javnoj cesti, u što kraćem roku otkloniti nastala oštećenja na nerazvrstanoj cesti radi dovođenja nerazvrstane ceste i saobraćaja u prvobitno stanje.

Član 13.

(1) Na mjestu ukrštanja nerazvrstane ceste sa željezničkom prugom moraju se preduzeti mjere osiguranja propisane Zakonom o osnovama i sigurnosti saobraćaja na cestama u Bosni i Hercegovini („Službeni glasnik BiH”, broj: 6/06) i Zakonom o sigurnosti željezničkog prometa („Službeni list RBiH”, broj: 33/95).

IV - ODRŽAVANJE NERAZVRSTANIH CESTA

Član 14.

(1) Pod održavanjem nerazvrstanih cesta u smislu ove odluke smatra se izvođenje radova kojima se osigurava nesmetan i siguran saobraćaj i očuvanje projektovanog stanja ceste.

Član 15.

(1) Poslovi održavanja nerazvrstanih cesta su:

1. poslovi redovnog održavanja i
2. poslovi vanrednog održavanja.

Član 16.

(1) Redovno održavanje čini skup mjera i radnji koje se obavljaju tokom većeg dijela ili cijele godine na nerazvrstanim cestama uključujući i sve objekte i instalacije sa svrhom održavanja prohodnosti i sigurnosti saobraćaja na njima.

(2) Poslovi redovnog održavanja nerazvrstanih cesta obuhvataju:

- popravak kolovoza, trupa ceste, potpornih i obložnih zidova i objekata na cesti,
- popravljavanje udarnih rupa na kolovozu,
- čišćenje kolovoza i objekata za odvodnju,
- održavanje bankina, kosina nasipa, usjeka i zasjeka,
- zamjena i popravak saobraćajne signalizacije i ostale opreme na cesti,
- izvođenje poslova u svrhu održavanja preglednosti ceste i znakova,
- košenje trave i održavanje zelenih površina u cestovnom pojasu,
- čišćenje snijega sa kolovoza i autobuskih stajališta,
- posipanje kolovoza u slučaju poledice,
- obavljanje drugih poslova kojima se osigurava stalan i siguran saobraćaj na nerazvrstanim cestama.

Član 17.

(1) Vanredno održavanje nerazvrstanih cesta obuhvaća obimnije radove koji se izvode u cestovnom pojasu i samo na osnovu tehničke dokumentacije i bez pribavljanja saglasnosti i druge dokumentacije prema Zakonu o prostornom

uređenju i građenju („Službene novine Ze-do kantona”, broj: 1/14).

(2) Poslovi vanrednog održavanja nerazvrstanih cesta obuhvataju:

- obnavljanje, zamjena i ojačavanje dotrajalih kolovoza,
- obnavljanje potpornih zidova,
- ojačavanje i zamjenu propusta,
- ojačavanje mostova i zaštita čelične konstrukcije,
- izrada pješačkih staza i ugrađivanje ivičnjaka,
- saniranje klizišta i odrona,
- obavljanje drugih obimnijih poslova koji ne spadaju u redovno održavanje.

Član 18.

(1) Radovi vanrednog održavanja nerazvrstanih cesta se mogu izvoditi samo na osnovu tehničke dokumentacije, a u skladu sa Zakonom o prostornom uređenju i građenju („Službene novine Ze-do kantona”, broj: 1/14).

Član 19.

(1) Poslovi redovnog i vanrednog održavanja nerazvrstanih cesta povjeravaju se pravnom licu po postupku i na način predviđen Zakonom o javnim nabavkama („Službeni glasnik BiH”, broj: 39/14).

(2) Izabrano pravno lice radove izvodi u skladu sa ugovorom kojim se regulišu vrsta radova koji su predmet ugovora, period na koji se ugovor zaključuje, ugovorena vrijednost radova, obaveze izvršioca radova, obaveze naručioca radova, stručni nadzor nad izvođenjem radova, odgovornost za eventualno prouzrokovane štete, način rješavanja nesuglasica i sporova te ostala pitanja od važnosti za izvršavanje radova na održavanju nerazvrstanih cesta.

Član 20.

(1) Održavanje revizijskih okana komunalnih instalacija i svih vrsta uređaja postavljenih unutar cestovnog pojasa nerazvrstane ceste dužan je provoditi vlasnik instalacija i uređaja.

Član 21.

(1) Radovi na održavanju nerazvrstane ceste se trebaju izvoditi tako da se zbog njih ne obustavlja saobraćaj.

(2) U slučaju da planirani radovi zahtijevaju obustavljanje saobraćaja, Općinska načelnica/Općinski načelnik, putem Službe za urbanizam, stambeno-komunalne poslove i katastar nekretnina na zahtjev izvođača radova, ocjenjuje opravdanost zahtjeva i izdaje odobrenje za obustavljanje saobraćaja i/ili izmjenu režima saobraćaja na nerazvrstanoj cesti.

(3) U izdatom odobrenju izvođaču se nalaže i postavljanje dopunske saobraćajne signalizacije i eventualno preduzimanje ostalih radnji potrebnih za sigurno odvijanje saobraćaja.

(4) Ukoliko se radovi na održavanju nerazvrstane ceste koji iziskuju izmiještanje saobraćaja izvode na dijelu nerazvrstane ceste gdje ne postoji mogućnost izmiještanja saobraćaja, u odobrenju se može naložiti da se radovi izvode noću.

(5) U izdatom odobrenju izvođaču se nalaže da nakon završetka radova ukloni dopunsku saobraćajnu signalizaciju i nerazvrstanu cestu dovede u stanje za neometano odvijanje saobraćaja.

V - ZAŠTITA I KORIŠTENJE NERAZVRSTANIH CESTA

Član 22.

(1) Pod zaštitom nerazvrstane ceste u smislu ove odluke podrazumijeva se:

- zaštita cesta od prekomjernog opterećenja prekoračenjem ukupne dozvoljene mase i osovinskog opterećenja,
- sprečavanje vršenja bespravnih radnji i gradnje u cestovnom pojasu,
- sprečavanje vršenja radnji na cesti i u cestovnom pojasu kojima bi se mogla oštetiti cesta odnosno ugroziti saobraćaj ili povećati troškovi održavanja nerazvrstane ceste,
- osiguranje preglednosti na raskrsnicama i krivinama,
- regulisanje odnosa sa susjedima uz nerazvrstanu cestu,
- sprečavanje deponovanja materijala na cestu ili uz cestu,
- regulisanje postavljanja kablova, vodova i instalacija u trupu ceste u cestovnom pojasu,
- regulisanje odvodnje, prekopavanja putnih i odvodnih kanala,
- regulisanje postavljanja i dopunjavanja saobraćajne i turističke signalizacije,
- regulisanje postavljanja reklamnih znakova,
- evidentiranje cesta, cestovnog pojasa, saobraćajne signalizacije i opreme na cestama,
- obaveza ugovaranja održavanja i zaštite cesta,
- regulisanje ograničenja i obustave saobraćaja,
- regulisanje gradnje prilaza,
- zaštita od nekontrolisanog izlaska većeg broja ljudi, djece, stoke i divljači na cestu,
- uklanjanje pokvarenih, napuštenih i oštećenih vozila sa ceste ili cestovnog pojasa,
- vršenje drugih radnji u svrhu zaštite nerazvrstanih cesta.

Član 23.

(1) Vozila na nerazvrstanoj cesti moraju ispunjavati određene uslove u smislu dozvoljenih dimenzija, ukupne mase i osovinskog opterećenja.

(2) Prekomjerno opterećenje nerazvrstane ceste podrazumijeva njenu upotrebu iznad vrijednosti saobraćajnog opterećenja za koju je cesta projektovana odnosno građena nastalu zbog obavljanja djelatnosti pravnih i fizičkih lica uz nerazvrstanu cestu.

(3) Pod djelatnostima iz stava (2) ovog člana kod kojih može doći do prekomjernog opterećenja nerazvrstane ceste smatra se: izgradnja infrastrukturnih i drugih objekata, proizvodnja odnosno eksploatacija energetskih mineralnih sirovina ili drugih prirodnih materijala, preusmjeravanje saobraćaja zbog zatvaranja javne ceste na duže od 10 dana na nerazvrstanu cestu.

(4) Ako se nerazvrstana cesta koristi na način da dolazi do prekomjernog saobraćajnog opterećenja pravna ili fizička lica koja je na taj način koriste su dužna podnijeti zahtjev za izdavanje odobrenja za prekomjernu upotrebu nerazvrstane ceste te platiti naknadu za prekomjerno opterećenje.

(5) Zahtjev za izdavanje odobrenja sadržava:

- opis djelatnosti korisnika,
- podatke o planiranoj količini tereta koji će se prevoziti nerazvrstanom cestom,
- kartu cestovne mreže sa ucrtanim itinererima,
- rješenje nadležnog organa kojim je odobreno obavljanje navedene djelatnosti.

(6) Naknada za prekomjerno opterećenje nerazvrstane ceste obračunava se na osnovu elaborata ili projekta prekomjernog oštećenja kojim se procjenjuju oštećenja na cesti zbog prekomjernog opterećenja.

(7) Odobrenje za prekomjerno opterećenje izdaje Općinska načelnica/Općinski načelnik putem Službe za urbanizam, stambeno-komunalne poslove i katastar nekretnina.

Član 24.

(1) Ako se pored nerazvrstane ceste nalazi prostor gdje se okuplja veći broj ljudi (sportska, dječija igrališta i sl.) ili zemljište na kojem se zadržavaju životinje (pašnjaci, ekonomska dvorišta i sl.) vlasnik, odnosno korisnik toga zemljišta dužan je taj prostor i zemljište ograditi na dijelu koji se proteže uz nerazvrstanu cestu.

(2) Ograda iz stava (1) ovog člana postavlja se i održava tako da sprječeni mogućnost direktnog dolaska ljudi i životinja s tih prostora i zemljišta na nerazvrstanu cestu.

Član 25.

(1) Zabranjeno je preduzimati bilo kakve radove ili radnje na nerazvrstanoj cesti i cestovnom pojasu ako bi ti radovi odnosno radnje mogli oštetiti nerazvrstanu cestu, povećati troškove održavanja odnosno ugrožavati ili ometati saobraćaj na istoj, a naročito:

- iznositi blato ili prljati cestu bilo čime,
- na nerazvrstanu cestu i u odvodna tijela ceste dovoditi vodu i druge tekućine i ometati njihovo otjecanje,
- istresati u cestovne jarke materijal ili tekućinu,
- napajati i napasati životinje u cestovnom pojasu,
- po nerazvrstanoj cesti vući grede, balvane, i druge teške predmete kojima bi se cesta mogla oštetiti,
- prosipati po nerazvrstanoj cesti maziva i druge masne tvari,
- ostavljati na cesti i u cestovnom pojasu pokvarena, oštećena ili trajno napuštena vozila,
- iscrtavati i brisati horizontalnu saobraćajnu signalizaciju,
- oštećivati, premještati, zaklanjati, okretati, otuđivati vertikalnu saobraćajnu signalizaciju i cestovnu opremu,
- postavljati reklamne znakove u cestovni pojas bez saglasnosti upravitelja,
- oštećivati zaštitne i druge ograde pored ceste,
- paliti travu, korov, građu i drugi materijal u cestovnom pojasu,
- vršiti bilo kakve radove na kosinama nasipa, zasjeka, usjeka,
- vršiti uzurpaciju cestovnog zemljišta (privoditi ga drugoj namjeni-poljoprivrednoj površini, okućnici i slično).

Član 26.

(1) Vlasnici zemljišta uz cestovni pojas su dužni dopustiti jednostavan odvod vode i odlaganje snijega na njihovo zemljište ako im se time ne nanosi šteta.

(2) Vlasnici zemljišta uz cestovni pojas su dužni u skladu sa ovom odlukom i uz odštetu dozvoliti pristup cestovnim objektima radi njihovog održavanja, gradnje odvodnih jaraka i drugih uređaja za odvod vode od cestovnog pojasa do recipijenta, postavljanje privremenih ili stalnih uređaja za zaštitu ceste i saobraćaja na njoj od leda, snijega, buke, štetnih svjetlosnih utjecaja i slično ako ih nije moguće postaviti na zemljište koje je sastavni dio ceste.

(3) Vlasnici zemljišta uz cestovni pojas su dužni:

- održavati živice,

- uklanjati drveće ili dijelove krošnje drveta koje otežavaju saobraćaj ili onemogućavaju zračenje i sušenje ceste,
- ugraditi betonske cijevi odgovarajućeg profila na pristupnim prijelazima preko jaraka u nivou sa cestom.

Član 27.

(1) U blizini raskršća dviju nerazvrstanih cesta ili ukrštanja nerazvrstane ceste sa željezničkom prugom u istom nivou ili na unutrašnjim stranama cestovnog zavoja i na krivinama ne smije se saditi drveće, grmlje ili visoke poljske kulture, postavljati naprave, ograde, reklamni znakovi ili drugi predmeti koji onemogućavaju preglednost na nerazvrstanoj cesti odnosno željezničkoj pruzi (trougao preglednosti). Trougao preglednosti utvrđuje se tehničkom dokumentacijom ceste odnosno željezničke pruge.

(2) Vlasnici odnosno korisnici ili posjednici zemljišta dužni su na zahtjev upravitelja nerazvrstane ceste odnosno korisnika koncesije ukloniti drveće, grmlje ili visoke poljske kulture, naprave, ograde, reklamne znakove i druge predmete radi osiguranja preglednosti na nerazvrstanoj cesti.

(3) Ako vlasnik, korisnik ili posjednik zemljišta ne postupi na način iz prethodne odredbe učinit će to pravno lice kome je povjereno održavanje nerazvrstane ceste po rješenju komunalno-putnog inspektora na teret vlasnika odnosno korisnika ili posjednika zemljišta.

Član 28.

(1) Saobraćajni znakovi, signalizacija i oprema nerazvrstane ceste postavlja se na osnovu Projekta saobraćajne signalizacije.

(2) Postavljanje saobraćajne i turističke signalizacije na nerazvrstanoj cesti ustupa se ovlaštenom pravnom licu na način i u skladu sa postupkom propisanim Zakonom o javnim nabavkama.

Član 29.

(1) Općinska načelnica/Općinski načelnik u opravdanim slučajevima može rješenjem zabraniti saobraćaj motornih vozila na nerazvrstanoj cesti.

(2) Zabrana saobraćaja za sve vrste vozila na nerazvrstanoj cesti može biti samo privremena, a za pojedine vrste vozila ili vozila iznad određene granice opterećenja može biti trajna.

(3) U slučaju uvođenja zabrane na nerazvrstanoj cesti ili njenim pojedinim dijelovima moraju se odrediti alternativni pravci za odvijanje saobraćaja.

Član 30.

Pravna i fizička lica u cilju obavljanja svoje djelatnosti mogu graditi elektronske, telefonske i komunalne objekte i instalacije i postavljati reklame u cestovnom pojasu nerazvrstane ceste u skladu sa Zakonom o prostornom uređenju i građenju („Službene novine Ze-do kantona”, broj: 1/14) i u skladu sa ovom odlukom.

Član 31.

(1) Pod priključkom na nerazvrstanu cestu u smislu ove odluke smatra se spoj nerazvrstane ceste i druge uređene površine sa koje se vozila i drugi učesnici u saobraćaju direktno uključuju u saobraćaj ili isključuju iz saobraćaja.

(2) Priključak na nerazvrstanu cestu se može izvesti samo na osnovu odobrenja izdatog od Službe za urbanizam, stambeno-komunalne poslove i katastar nekretnina.

(3) Troškove izgradnje priključka na nerazvrstanu cestu u skladu sa projektom saobraćajnog priključka i izdatim odobrenjem snosi investitor priključka.

Član 32.

(1) Općinska načelnica/Općinski načelnik putem Službe za urbanizam, stambeno-komunalne poslove i katastar nekretnina izdaje:

- odobrenje za priključak na nerazvrstanu cestu,
- odobrenje za izgradnju objekata i instalacija unutar cestovnog pojasa i zaštitnog pojasa nerazvrstane ceste,
- odobrenje za postavljanje reklama u cestovnom pojasu nerazvrstane ceste,
- odobrenje za prekomjernu upotrebu nerazvrstane ceste,
- odobrenje za korištenje cestovnog zemljišta nerazvrstane ceste,
- odobrenje za privremenu izmjenu režima saobraćaja na nerazvrstanoj cesti.

Član 33.

(1) Zaštitni pojas nerazvrstane ceste je pojas na kome važi poseban režim gradnje i uspostavlja se sa ciljem zaštite nerazvrstane ceste i sigurnosti saobraćaja na istoj od štetnih uticaja i različitih aktivnosti u prostoru pored nerazvrstane ceste.

(2) U postupku izdavanju urbanističke salasnosti ili odobrenja za građenje objekata ili instalacija unutar cestovnog ili zaštitnog pojasa nerazvrstane ceste Odsjek za urbanizam i prostorno planiranje je obavezan pribaviti prethodnu saglasnost odnosno odobrenje upravitelja.

(3) Zaštitni pojas nerazvrstane ceste u smislu stava 1. ovog člana unutar kojeg se ne mogu graditi stambene i poslovne zgrade, bunari,

rezervoari i septičke jame iznosi 5m od vanjske ivice putnog pojasa.

Član 34.

- (1) Pravna i fizička lica za korištenje cestovnog zemljišta nerazvrstanih cesta u slučajevima iz člana 30. ove odluke obavezna su plaćati naknadu.
- (2) Naknada za korištenje cestovnog zemljišta nerazvrstanih cesta utvrđuje se ovom odlukom i plaća unaprijed u jednokratnom iznosu.

Član 35.

- (1) Visina naknade za korištenje cestovnog zemljišta nerazvrstanih cesta obračunava se po m² na godišnjem nivou i iznosi:
 1. za benzinske stanice, hotele, motele, ostale ugostiteljske objekte, autoservise i druge poslovne i proizvodne objekte 2,00 KM/m²,
 2. stambeni objekti ne podliježu plaćanju naknade za korištenje cestovnog zemljišta nerazvrstane ceste.
- (2) Visina naknade za korištenje cestovnog zemljišta nerazvrstanih cesta obračunava se po m¹ na godišnjem nivou i iznosi:
 1. za infrastrukturne vodove (telekomunikacijske i elektronske kablove i sl.) 0,75 KM/m¹.
- (3) Visina naknade za korištenje cestovnog zemljišta nerazvrstanih cesta za postavljanje reklame obračunava se po m² na godišnjem nivou i iznosi:
 1. jednostrana reklama neosvijetljena 10,00 KM/m²,
 2. jednostrana reklama osvijetljena 20,00 KM/m²,
 3. dvostrana reklama neosvijetljena 15,00 KM/m²,
 4. dvostrana reklama osvijetljena 30,00 KM/m².
- (4) Visina naknade za prekomjernu upotrebu nerazvrstane ceste utvrđuje se na osnovu Elaborata o procjeni oštećenja koje će prekomjerna upotreba nerazvrstanih cesta prouzrokovati.
- (5) Elaborat o procjeni oštećenja o prekomjernoj upotrebi nerazvrstane ceste izrađuje stručno lice koje će posebnim aktom imenovati upravitelj nerazvrstane ceste.
- (6) Naknada po rješenju iz stava (1) i (2) ovog člana obračunava se od dana donošenja rješenja do 31.12. tekuće godine, a za svaku narednu godinu korištenja cestovnog zemljišta donosi se novo rješenje u kojem je obračunski period od dana 01.01. do 31.12. odnosne godine.
- (7) Naknada po rješenju iz stava (3) ovog člana obračunava se za vremenski period odobrenog korištenja cestovnog zemljišta.

Član 36.

- (1) Pored naknada koje su korisnici dužni plaćati u skladu sa prethodnim članom ove odluke, podnosioci zahtjeva plaćaju i administrativne troškove postupka za donošenje rješenja i to:
 1. naknada za davanje saglasnosti, odnosno odobrenja za lokaciju i izgradnju benzinske stanice i ugostiteljskih objekata sa priključkom na nerazvrstanu cestu iznosi 200,00 KM,
 2. naknada za davanje saglasnosti, odnosno odobrenja za polaganje infrastrukturnih vodova (telekomunikacijske instalacije elektroinstalacije i sl.) kroz trup ceste i cestovni pojas nerazvrstane ceste iznosi 100,00 KM,
 3. naknada za davanje saglasnosti, odnosno odobrenja za postavljanje reklama u cestovnom pojasu nerazvrstane ceste iznosi 50,00 KM,
 4. naknada za davanje saglasnosti, odnosno odobrenja za izgradnju prilaza na nerazvrstanu cestu iznosi 50,00 KM,
 5. naknada za davanje odobrenja za prekomjernu upotrebu nerazvrstane ceste iznosi 40,00 KM.

Član 37.

- (1) Sredstva ostvarena od naknada za korištenje cestovnog zemljišta i prekomjernog saobraćajnog opterećenja uplaćuje se na račun Općine kao namjenska sredstva za održavanje, rekonstrukciju i sanaciju nerazvrstanih cesta.

VI - INSPEKCIJSKI NADZOR

Član 38.

- (1) Poslove inspekcijskog nadzora nad provođenjem ove odluke vrši općinski komunalno-putni inspektor.
- (2) Općinski komunalno-putni inspektor, vršeći inspekcijski nadzor u skladu sa Zakonom o cestama FBiH („Službene novine FBiH”, broj: 12/10, 16/10 i 66/13), ima slijedeća prava i dužnosti:
 1. pregledati stanje cesta,
 2. pregledati radove na izgradnji, rekonstrukciji, sanaciji, održavanju i zaštiti nerazvrstanih cesta,
 3. pregledati radove koji se obavljaju na cesti u zaštitnom i cestovnom pojasu nerazvrstanih cesta,
 4. pregledati tehničku dokumentaciju u vezi sa radovima iz prethodnih tački 2. i 3. (dozvole, saglasnosti, projekti, standardi),
 4. pregledati planove, programe, ugovore i ostalu dokumentaciju koja se odnosi na održavanje i zaštitu nerazvrstanih cesta,

5. pregledati provođenje mjere za osiguranje nerazvrstanih cesta i saobraćaja na njima,

6. pregledati provođenje propisanih uvjeta za obavljanje zahvata u cestovnom i zaštitnom pojasu nerazvrstanih cesta,

7. pregledati obavljanje upravnih i stručno-tehničkih poslova na nerazvrstanim cestama.

(3) Općinski komunalno-putni inspektor, vršeći inspekijski nadzor, ima pravo:

1. pregledati objekte, uređaje, materijale, dokumentaciju preduzeća i upravnih organizacija koje upravljaju cestama, kao i izvođača na gradnji, rekonstrukciji ili održavanju cesta,

2. saslušati stranke i svjedoke primjenom pravila upravnog postupka,

3. uzeti uzorke materijala, te obavljati druge poslove koji su u skladu sa namjenom inspekijskog nadzora.

(4) Vršeći inspekijski nadzor, općinski komunalno-putni inspektor ima pravo narediti:

1. obustavu radova koji se izvode na nerazvrstanim cestama, u cestovnom ili zaštitnom pojasu, suprotno odredbama Zakona o cestama FBiH, ove odluke, tehničkim propisima, standardima i normativima, te dati rok za otklanjanje nedostataka,

2. otklanjanje nedostataka na nerazvrstanim cestama koji ugrožavaju sigurnost saobraćaja na njima,

3. privremenu zabranu odvijanja saobraćaja na nerazvrstanim cestama ili njihovom dijelu, ako utvrdi da se na njima ne može sigurno odvijati saobraćaj, te narediti da se odmah poduzmu mjere za osiguranje saobraćaja,

4. obustavu saobraćaja cestovnim motornim vozilima koja zbog svojih tehničkih svojstava ili načina na koji saobraćaju mogu nanijeti štetu nerazvrstanim cestama ili njenom dijelu i kada je njihov saobraćaj na cesti u suprotnosti sa zakonom i drugim propisima,

5. isključenje cestovnog motornog vozila iz saobraćaja na nekategorisanoj cesti kada utvrdi da dimenzije i ukupna masa ili njegovo osovinsko opterećenje prelazi veličine iz člana 56. Zakona o cestama FBiH, a prijevoznik nema odgovarajuću dozvolu za vanredni prevoz,

6. privremenu zabranu saobraćaja na novoizgrađenoj i rekonstruiranoj nerazvrstanoj cesti, njenom dijelu ili objektu na njoj, ako utvrdi da sa gledišta sigurnosti saobraćaja ne ispunjava tehničke uvjete,

7. rušenje građevine ili njenih dijelova i drugih objekata na teret investitora, kao i uspostavljanje prvobitnog stanja, ako su izgrađene ili se grade na nerazvrstanoj cesti ili cestovnom

pojasu bez odobrenja ili saglasnosti ili suprotno uvjetima iz odobrenja, odnosno saglasnosti nadležnog organa,

8. rušenje reklamnih znakova u cestovnom i zaštitnom pojasu postavljenih bez odobrenja ili suprotno uvjetima iz odobrenja nadležnog organa,

9. u nužnim slučajevima, kada bi bila ugrožena sigurnost saobraćaja na nerazvrstanoj cesti ili bi mogla nastati šteta na njoj, odrediti privremene mjere kako bi se otklonila opasnost ili spriječila šteta,

10. da se u polju preglednosti otklone nedostaci i nepravilnosti prouzrokovane kršenjem propisanih mjera za osiguranje preglednosti nerazvrstane ceste,

11. poduzimanje i drugih mjera u skladu sa Zakonom o cestama FBiH i drugim propisima donesenim na osnovu ovog zakona.

(4) Općinski komunalno-putni inspektor je dužan bez odlaganja podnijeti zahtjev za pokretanje prekršajnog postupka, ako u vršenju nadzora utvrdi da je počinjen prekršaj iz ove odluke.

Član 39.

(1) Pravna i fizička lica kod kojih se vrši inspekijski nadzor dužna su omogućiti rad inspektoru, pružiti potrebnu pomoć i na njegovo traženje u određenom roku dostaviti podatke i dokumentaciju za vršenje inspekijskog nadzora u smislu Zakona o cestama FBiH i ove odluke.

VII - KAZNE NE ODREDBE

Član 40.

(1) Za prekršaje utvrđene u ovoj odluci kaznit će se počinitelac ako:

1. vrši izgradnju ceste bez odobrenja za građenje,

2. vrši izgradnju ili rekonstrukciju ceste sa nepotpunom tehničkom dokumentacijom,

3. ne izmjesti ili ne prilagodi instalacije nastalim promjenama u roku (član 12.),

4. ne osigura trajno, neprekidno i kvalitetno održavanje i zaštitu cesta ili ne zaključi ugovor o održavanju cesta u skladu sa odredbama člana 19. ove odluke,

5. ne održava revizijska okna i instalacije iz člana 20. ove odluke,

6. prekomjerno koristi nerazvrstanu cestu suprotno članu 23. ove odluke,

7. ne postavi ogradu na dijelu prostora gdje se okuplja veći broj ljudi ili na zemljištu na kojem se redovno zadržavaju životinje, a koji se protežu uz nerazvrstanu cestu (član 24.),

8. ne poštuje zabrane propisane članom 25. ove odluke,

9. ne poštuje odredbe propisane članom 26. ove odluke,

10. sadi drveće, grmlje ili visoke poljske kulture, postavlja naprave, ograde, reklamne znakove ili druge predmete koji onemogućavaju preglednost na cestu (trougao preglednosti) u blizini ukrštanja dviju cesta u nivou ili ukrštanja cesta sa željezničkom prugom u nivou ili na unutrašnjim stranama cestovnog zavoja (član 27.),

11. bez saglasnosti upravitelja izvrši ili odobri izgradnju instalacija ili građevina (član 33.),

12. ne omogući vršenje inspeksijskog nadzora i ne pruži pomoć pri vršenju inspeksijskog nadzora (član 39.).

(2) Novčanom kaznom u iznosu od 500,00 KM do 5.000,00 KM kaznit će se pravno lice, a u iznosu 100,00 KM do 500,00 KM odgovorno lice u pravnom licu za radnje koje imaju obilježja prekršaja.

(3) Novčanom kaznom u iznosu od 200,00 KM do 2.000,00 KM kaznit će se pojedinac koji samostalno obavlja djelatnost ličnim radom (samostalni privrednik, obrtnik).

(4) Novčanom kaznom u iznosu od 50,00 KM do 500,00 KM kaznit će se fizičko lice.

VIII - ZAVRŠNE ODREDBE

Član 41.

(1) Ova odluka stupa na snagu narednog dana od dana objavljivanja u „Službenom glasniku općine Visoko”.

Broj: 01/1-02-369/15
17.10.2015. godine
Visoko

PREDSJEDAVAJUĆA
OPĆINSKOG VIJEĆA VISOKO
Mirela Mateša Bukva

78.

Na osnovu člana 10. stav 2. Zakona o porezu na promet nekretnina („Službene novine Ze-do kantona“, broj: 06/09 i 06/13) i člana 22. stav 1. tačka 8. Statuta općine Visoko („Službeni glasnik općine Visoko“, broj: 08/06, 05/09 i 09/13), Općinsko vijeće Visoko, na 31. sjednici, održanoj 17.10.2015. godine, donijelo je

RJEŠENJE

o imenovanju Komisije za procjenu prometne vrijednosti nekretnina

I

U Komisiju za procjenu prometne vrijednosti nekretnina imenuju se:

1. Emir Fejzović, za predsjednika;
2. Muhamed Husić, za člana;
3. Fadil Mostić, za člana;

II

Mandat Komisije traje dvije godine.

III

Zadatak Komisije je da vrši procjenu prometne vrijednosti nekretnine u skladu sa Zakonom o porezu na promet nekretnina („Službene novine Ze-do kantona“, broj: 06/09 i 06/13).

Komisija ima sekretara, koji vrši administrativno-stručne poslove za Komisiju, bez prava odlučivanja.

IV

Sekretara Komisije imenuje Općinska načelnica iz reda uposlenika organa uprave.

V

Članovima Komisije pripada naknada za rad u visini naknade za rad članova radnih tijela Općinskog vijeća, utvrđena u Odluci o visini naknade vijećnika i članova radnih tijela Općinskog vijeća Visoko („Službeni glasnik općine Visoko“, broj: 04/07 i 02/11), te naknada za materijalne troškove rada Komisije.

Naknada za rad ne pripada sekretaru Komisije.

VI

Stupanjem na snagu ovog Rješenja prestaje da važi Rješenje Općinskog vijeća Visoko o imenovanju Komisije za procjenu prometne vrijednosti nekretnina, broj: 01/1-02-151/13 od 01.06.2013. godine i Rješenje Općinskog vijeća Visoko o izmjeni i dopuni Rješenja o imenovanju Komisije za procjenu vrijednosti prometne vrijednosti nekretnine, broj: 01/1-02-288/14 od 20.06.2014. godine.

VII

Ovo rješenje objavit će se u „Službenom glasniku općine Visoko“.

Broj: 01/1-02-367/15
17.10.2015. godine
Visoko

PREDSJEDAVAJUĆA
OPĆINSKOG VIJEĆA VISOKO
Mirela Mateša Bukva

79.

Na osnovu člana 12. Zakona o ministarskim, vladinim i drugim imenovanjima Federacije BiH („Službene novine FBiH“, broj: 12/03, 34/03 i 65/13), člana 16. Odluke o promjeni oblika JKP „Visočica“ Visoko, p.o. i organizovanju javnog preduzeća u obliku društva sa ograničenom odgovornošću u skladu sa Zakonom o privrednim društvima i Zakonom o javnim preduzećima („Službeni glasnik općine Visoko“, broj: 08/06, 05/09 i 09/13), člana 5.

Odluke o promjeni naziva firme, sjedišta i proširenja djelatnosti JKP "Visočica" doo Visoko ("Sl. glasnik općine Visoko", broj: 02/14), i Zaključka Općinskog vijeća Visoko o davanju ovlaštenja predstavniku Općine u Skupštini JKP „Visoko“ doo Visoko za imenovanje člana Nadzornog odbora JKP „Visoko“ doo Visoko, broj: 01/1-02-153/15 od 21.05.2015. godine, predstavnik Općine Visoko u Skupštini JKP „Visoko“ doo Visoko donosi:

R J E Š E N J E
o konačnom imenovanju
člana Nadzornog odbora
JKP „Visoko“ doo Visoko

I

Amar Karavdić iz Visokog, imenuje se za člana Nadzornog odbora JKP „Visoko“ doo Visoko.

II

Imenovanje se vrši na period do isteka četverogodišnjeg mandata članova Nadzornog odbora JKP „Visoko“ doo Visoko, imenovanih 07.10.2013. godine.

III

Ovlašćuje se direktor Javnog preduzeća da sa imenovanim članom Nadzornog odbora zaključi ugovor o angažmanu kojim će se urediti međusobna prava i obaveze u skladu sa zakonom i aktima Javnog preduzeća.

IV

Za obavljanje poslova iz nadležnosti Nadzornog odbora članu pripada naknada.

Visinu naknade iz prethodnog stava utvrđuje Općinsko vijeće, a ista se isplaćuje iz sredstava Javnog preduzeća.

V

Ovo rješenje objaviće se u „Službenom glasniku općine Visoko“.

Broj: 2623 **PREDSTAVNIK OPĆINE VISOKO**
11.09.2015. godine u Skupštini JKP „Visoko“ doo Visoko
Visoko **Edina Ferizović**

S A D R Ź A J

Redni broj	Strana
I - OPĆINSKO VIJEĆE	
76. Odluka o pristupanju izradi Regulacionog plana Čekrekčije - Visoko.....	1
77. Odluku o nerazvrstanim cestama na području općine Visoko.....	1
78. Rješenje o imenovanju Komisije za procjenu prometne vrijednosti nekretnina.....	9
II - SKUPŠTINE JAVNIH PREDUZEĆA	
79. Rješenje o konačnom imenovanju člana nadzornog odbora JKP „Visoko“ doo Visoko.....	9

Izdavač: Općina Visoko, ul. Alije Izetbegovića br. 12A, Visoko

Uređuje: Muhamed Halilbegović, stručni saradnik

Glavni i odgovorni urednik: Zekija Omerbegović, sekretar Općinskog vijeća, **Telefon:** 032/732-502

Štampa: INDACO d.o.o. Visoko, **Telefon:** 061/449-302